

In memorie di Marzi

M A R I A R O S I T A C A G N I N A

O ai cognossût Marzi tal mês di Novembar dal 1987. O jeri tal secont an di universitât e Marzi al jere il gno professôr di Contabilitât Economiche Nazionâl. Un “prof.” particolâr a partî dal non: l’unic cun doi cognoms e cuntun aiar tra il distrat, l’ecumenic e l’autorevul. Un om che in aparence no si inrabiave mai (almancul fin cuant che no lu cognossei miôr come representante dai students in Consei di Aministratzion), puntuâl, cordiâl, disponibil cui students e cuntune vision une vore clare di ce che e veve di jessi la Universitât dal Friûl.

O ai condividût cun lui, ognidun tal so rûl, cetantis bataiis e esperiençis. Cuant che al cjatave un student che par lui al jere sveât e al mostrave di vê potenziâl, sigûr che al finive par proponii cualchi atividât. E cussì za di studente mi soi cjatade a colaborâ cun lui e a scuvierzi trop che al jere curiôs e plen di culture, cun cetancj interès al di fûr dal ambit sientific de statistiche. Al amave la storie, lis origiins e il pandisi des lenghis e de int, e i voleve tant ben al Friûl, tiere dulà che a jerin rivâts i siei vons, sintint la responsabilitât des origiins e dal non che al puartave. Al jere impegnât tal sociâl, te culture e te politiche. Al jere membri di tantis associazzions in forme ative e vulcaniche.

Nancje no mi visi il numar di rivistis e notiziariis che al seguive come autôr e colaboradôr. Al jere un grant lavoradôr.

Cun lui o ai imparât tant. Prin di dut il rispiet pai students; il sens dal dovê, che o vevi za imparât cui miei gjenitôrs, cul so esempli al cjapave altris significâts impuartants come chel dal sens e dal rispiet de *res publica* e dal metisi a disposizion de coletivitât. In Universitât al jere il prin a

rivâ e l'ultin a lâ vie di sere. Al jere un cavalîr medievâl moderni. Dispès, cu la mè muse rote, come che mi faveva notâ ridint surian e mandantmi sul mus, i disevi che a jerin cambiâts i mûts e i temps, ma la nature e jere simpri chê dai siei vons. Cjaviestri ma simpri disponibil al dialic e a cambiâ idee se si confrontave cun argoments che lu convincevin: ce discussions vie pe tesi!

Mi visi che une dì i tacai une vignete su la puarte che e zuiave cul acent te peraule *Sassone*, spostantlu de prime ae seconde silabe dant cussì une definizion ridicule e alternative ae peraule midiant de imagjin: une piere cul elm asburgijc. E duncje *Sassone* e deventave la peraule par definî une grande piere di origijn teutoniche. Chê vignete le à conservade par agns, a dimostrazion che al veve ancje un marcât sens dal umorisim, ancje se no lu faveva viodi, fasint fente di no capî lis batudis che i favevin in chê bande di siei ex students e laureâts che i sin restâts dongje e che lui al jere content di vê dongje di sè.

Une volte deventade ricercjadore o ai continuât a colaborâ cun lui, stant che, ancje dopo de pension, al jere cjapât di mil impegnis e iniziativis dulà che al finive simpri par tirâmi dentri, ancje se no volevi. Cualchi volte o rugnavi ma ae fin lu judavî simpri, savint che ogni volte o varès imparât alc di gnûf. L'ultin fat al è in merit al so libri. Stant che nol saveva doprâ masse ben la tecnologie (mitiche la sô idee di cemût che al funziona un sfuei di calcul! Cence contâ lis tantis telefonadis par domandâ une man cuant che alc sul so pc o sul so telefonut nol lave come al voleve lui!) mi domandà di judâlu pe costruzion di une presentazion e, dopo di vêi mostrât cemût che al funzionave il program, lu lassai a lavorâ. Cuant che al finì mi cirì par sistemâle te forme grafiche. Le fasei scori par viodi se al fos dut a puest e o tacai a fâ la presentazion come se o stes fasint lezion. Al restâ maraveât e al tacà a ridi domandantmi cemût mai che o cognossevi cussì ben l'argoment, pensant che quasi quasi o podevi lâ jo a fâ la presentazion al so puest. I disei che al jere un an che nol fevelave di altri che no fossin lis ideis e lis perplessitâts che a vignivin indevant cul lavôr dal libri e che mi domandave une man par une ricerche su internet o un confront dialetic. Robe che, dal rest, o favevi ancje jo cuant che mi lambicavi su cualchi cuistion. Chest confront che aromai e jere deventade une usance mi mancjarà tantonon.